

*დამტკიცებულია ადამიანთ ვაჭრობის (ტრეფიკინგის)  
წინააღმდეგ მიმართული ღონისძიებების განმახორციელებელი  
საუწყებათშორისო საკოორდინაციო საბჭოს მიერ*

*24 დეკემბერი, 2018*

**ადამიანთ ვაჭრობის (ტრეფიკინგის) წინააღმდეგ მიმართული ღონისძიებების  
განმახორციელებელ საუწყებათშორისო საკოორდინაციო საბჭოსთან შექმნილი  
მუდმივმოქმედი ჯგუფის**

**შემადგენლობა და საქმიანობის წესი**

### **მუხლი 1. მუდმივმოქმედი ჯგუფის შემადგენლობა**

1. ადამიანთ ვაჭრობის (ტრეფიკინგის) მსხვერპლის სტატუსის მინიჭების საკითხს წყვეტს ადამიანთ ვაჭრობის (ტრეფიკინგის) წინააღმდეგ მიმართული ღონისძიებების განმახორციელებელ საუწყებათშორისო საკოორდინაციო საბჭოსთან (შემდგომში - საბჭო) შექმნილი მუდმივმოქმედი ჯგუფი (შემდგომში - მუდმივმოქმედი ჯგუფი), რომლის წევრებიც არიან:

- ა) საქართველოში მიგრაციის საერთაშორისო ორგანიზაციის წარმომადგენლობა;
- ბ) მიგრაციის პოლიტიკის განვითარების საერთაშორისო ცენტრის წარმომადგენლობა საქართველოში;
- გ) არასამეწარმეო (არაკომერციული) იურიდიული პირი - საქართველოს ახალგაზრდა იურისტთა ასოციაცია;
- დ) არასამეწარმეო (არაკომერციული) იურიდიული პირი - საინფორმაციო სამედიცინო-ფსიქოლოგიური ცენტრი „თანადგომა“;
- ე) არასამეწარმეო (არაკომერციული) იურიდიული პირი - ძალადობისაგან დაცვის ეროვნული ქსელი.

2. მუდმივმოქმედი ჯგუფის წევრები საკუთარი წარმომადგენლის ვინაობას წარუდგენენ საბჭოს.

### **მუხლი 2. მუდმივმოქმედი ჯგუფისთვის სავარაუდო მსხვერპლის შესახებ ინფორმაციის მიწოდება**

მუდმივმოქმედი ჯგუფისთვის სავარაუდო მსხვერპლის შესახებ ინფორმაციის მიწოდება ხდება საქართველოს მთავრობის 2014 წლის 11 აპრილის N284 დადგენილებით დამტკიცებული ადამიანთ ვაჭრობის (ტრეფიკინგის) მსხვერპლთა იდენტიფიცირების ერთიანი სტანდარტებისა და წესის შესაბამისად.

### **მუხლი 3. ადამიანით ვაჭრობის (ტრეფიკინგის) მსხვერპლის სტატუსის მინიჭება**

1. სსიპ – ადამიანით ვაჭრობის (ტრეფიკინგის) მსხვერპლთა, დაზარალებულთა დაცვისა და დახმარების სახელმწიფო ფონდთან (შემდგომში - ფონდი) არსებული სპეციალური მობილური ჯგუფის მიერ სავარაუდო მსხვერპლის საიდენტიფიკაციო კითხვარის მიწოდებიდან 48 საათის განმავლობაში, მუდმივმოქმედი ჯგუფი შეისწავლის კითხვარში მოცემულ ინფორმაციას, განიხილავს სავარაუდო მსხვერპლისათვის სტატუსის მინიჭების საკითხს და იღებს შესაბამის გადაწყვეტილებას. სავარაუდო მსხვერპლის მოთხოვნის შემთხვევაში, შესაძლებელია მუდმივმოქმედი ჯგუფის გასაუბრება მასთან.
2. მუდმივმოქმედი ჯგუფის მიერ უცხო სახელმწიფოს, საერთაშორისო ან უცხოეთის არასამთავრობო ორგანიზაციების მიერ მინიჭებული მსხვერპლის სტატუსის მქონე პირისათვის მსხვერპლის სტატუსის მინიჭება ავტომატურად არ ხდება. უცხო ქვეყნის მოქალაქეს საქართველოში მსხვერპლის სტატუსი მიენიჭება, თუ მის მიმართ განხორციელებული დანაშაულებრივი ქმედება დაიწყო, გაგრძელდა ან დამთავრდა საქართველოში. მუდმივმოქმედი ჯგუფი ასეთ შემთხვევას განიხილავს სხვა შემთხვევების თანაბრად, დადგენილი წესის მიხედვით.
3. მუდმივმოქმედი ჯგუფი გადაწყვეტილება უნარიანია თუ მას ესწრება წევრთა ნახევარზე მეტი. მუდმივმოქმედი ჯგუფი მსხვერპლის სტატუსის მინიჭების საკითხის შესახებ გადაწყვეტილებას იღებს ხმათა ოთხი მეხუთედით.
4. სავარაუდო მსხვერპლისათვის მსხვერპლის სტატუსის მინიჭების შემთხვევაში, მუდმივმოქმედი ჯგუფი თითოეულ შემთხვევაზე გასცემს შესაბამის დოკუმენტს, რომლის ერთი პირი გადაეცემა მსხვერპლს, ერთი პირი რჩება მუდმივმოქმედ ჯგუფს და ერთი პირი ეგზავნება ფონდს. მსხვერპლის სტატუსის მინიჭებისას მუდმივმოქმედი ჯგუფი მსხვერპლს აწვდის წერილობით ინფორმაციას თავშესაფრით, კომპენსაციით, სამედიცინო დახმარების და სხვა პროგრამებით სარგებლობის შესახებ.
5. მუდმივმოქმედი ჯგუფის მიერ სავარაუდო მსხვერპლისათვის მსხვერპლის სტატუსის მინიჭებაზე უარის თქმის შემთხვევაში, მუდმივმოქმედი ჯგუფი ინფორმაციას აწვდის ფონდს.
6. მუდმივმოქმედი ჯგუფის წევრები ვალდებული არიან საიდუმლოდ შეინახონ სავარაუდო მსხვერპლის მაიდენტიფიცირებელი მონაცემები მისთვის მსხვერპლის სტატუსის მინიჭების ან სტატუსის მინიჭებაზე უარის თქმის მიუხედავად. მონაცემების გამჟღავნება იწვევს პასუხისმგებლობას კანონმდებლობით დადგენილი წესით.